

欽定剿平粵匪方略

欽定勦平粵匪方略卷二百七十三 辛酉年

八月十二日 戊辰 胡林翼奏言 臣自太湖回省病

勢日重復蒙

恩賞假兩箇月在署調理近日以來多方醫治無如欬

逆彌甚嘔血日至升餘形銷神瘁氣息奄奄據

醫者云積勞內傷肺胃損敗非專心靜養難期

奏效 臣受

恩深重何敢稍頌微軀惟神志昏瞽元氣大虧力疾從事已逾一年軍務地方實多貽誤現在南岸一律肅清北岸之賊有安徽撫臣李續宜督辦必能次第掃除再四思維惟有仰懇

天恩准臣開缺回籍調理儻得病勢稍瘥一息尙存仍當捐軀圖報斷不敢稍耽安逸自外

生成惟南岸初報肅清德安甫經克復現在分兵剿

辦北岸黃州等處兵事緊要必須知兵大員督
率調度李續宜原係專辦楚皖軍務之員本年
二月帶兵回鄂一切調度均合機宜可否卽以
李續宜調任湖北巡撫臣之舊部向歸李續宜
管帶兵將一心必能得力至於吏治餉需李續
宜用兵鄂省已歷多年均所深悉如蒙

俞允臣卽將湖北巡撫關防敬謹委員移交實於鄂

饒大局均有裨益奏入

上諭內閣曰湖北巡撫胡林翼著再賞假兩箇月在
署安心調理毋庸開缺湖北巡撫著李續宜暫行
署理

十五日辛未官文曾國藩奏言逆首四眼狗陳玉

城自安慶敗竄後復糾僞輔王楊輔青率大股
匪黨號稱十餘萬自無爲州竄赴英山繞至宿

松希圖攻撲太湖爲救援安慶之計馬步數萬
直抵太湖城外山岡總兵胡裕發等嚴密防守
俟賊逼近齊開槍礮傷斃悍賊多名賊遂潰退
隱伏八里岡等處復有賊數萬自龍山宮對岸
至塔下分途誘敵我軍悉力穩守賊始退遁跟
蹤追至河干該逆分股由黃泥港小池驛而逃
是役共斃賊千餘名旋據多隆阿咨稱四眼狗

陳玉城與楊輔青各率大股約六七萬七月初
二日由太湖下竄清河三橋頭高樓嶺一帶勢
欲勾結桐城股匪圖解皖圍多隆阿派撥馬隊
赴馬鞍山擇要堵剿僞璋王林逆與吳如哮等
率黨六七千由桐城西大路直至掛車河黃汶
金亦率賊五六千山桐城東路品亭驛一帶繞
至雞公廟麻子嶺多隆阿親率馬步各營疾趨

掛車河西以備迎擊賊見兵至勢欲過河狂撲
多隆阿派參將譚仁芳等率新中等營迎擊璋
逆吳逆總兵雷正綰等率精選等營迎擊黃逆
並派馬隊繼之該逆整隊死拒鏖戰三時馬步
齊呼直上縱橫抄擊賊勢披靡追至城根城逆
見我軍追逼遂由西南東三門出隊攔阻多隆
阿派隊分投抵禦而另撥八營往攻蔣家山賊

壘拔其木城二道賊衆奪路狂奔立將賊壘五
座踏毀焚燒賊棚二百餘處是役共斃賊三千
餘名十二日猗輔各酋分路來犯均經擊敗追
殺多名其曾國荃安慶圍師水陸攻城亦平毀
城外石壘及東門外月城先後殺賊一千二百
有餘賊已同檻獸惟偵知援賊又到關外已
飭各軍慎密戒備力圖克復堅城盡殲醜類奏

入報

聞

十八日甲戌曾國藩奏言僞忠王李秀城竄擾江

西經臣派總兵鮑超督軍赴援七月初三日由

九江拔營前進瑞州奉新靖安安義踞匪聞風

退去由臨江過河盤踞樟樹沙湖豐城一帶鮑

超馳赴豐城該逆已在樟樹搭造浮橋過河至

西北岸圖撲我軍鮑超分派馬步三路出擊鏖
戰一時各營奮勇齊進該逆抵敵不住紛紛大
敗追殺五十餘里逆屍徧野約共斃賊七八千
名洵足寒賊膽而快人心鮑超所向克捷立功
最偉可否額懇

天恩賞賚物件以示優異在事尤爲出力及陣亡各
員謹先行開列懇請分別獎卹奏入

上諭內閣曰逆首李秀城竄擾江西湖北連陷二十餘城盤踞瑞州附近各州縣經鮑超痛加勦洗大挫兇鋒實屬奮勇可嘉著發去白玉搬指一箇白玉喜字翎管一枝大荷包一對小荷包四箇交鮑超祇領以示優獎其在事尤爲出力之總兵宋國永陳由立黃慶均著賞加提督銜副將馮標張玉田均著以總兵記名簡放額外協領明興著先行

拔補協領員缺副將顏紹榮李文益易昌煥吳騰
芳羅運昌劉順隆劉玉堂段大貴均著遇有副將
缺出儘先拔補參將熊鎮生著以副將儘先補用
參將鮑濟學遊擊陳永康均著遇有四川參將遊
擊缺出先行拔補唐仁廉著以參將儘先補用並
賞加副將銜直隸州知州伍華瀚著以本班留於
四川儘先遇缺卽補並賞加知府銜其餘出力文

武員弁著曾國藩擇尤保奏陣亡運同銜安徽候補直隸州知州袁觀豐都司殷雄亮均著交部從優議卹所保之婁雲慶一員前因克復徽州府城出力業以總兵記名遇缺簡放著該大臣另覈請獎

曾國藩又奏言接據統領安慶全軍卽用道曾國荃稟稱八月初一日卯刻官軍用地雷轟倒

北門城垣隊伍踰濠登城立將安慶省城克復
殺斃長髮老賊二萬餘人該逆情急龜水遁竄
又經水師截殺城內悍賊無一得脫四眼狗及
僞輔王璋王玗王各股援賊屯紮我軍後濠之
外當破城時列隊遠望其膽已落漸漸退去查
安慶省城淪陷已久楚軍圍攻兩載去冬合圍
逆酋四眼狗疊次拌死來援各軍苦守猛戰卒

得克此堅城圍殺淨盡足以伸

天討而快人心臣卽日前往安慶部署一切先將克復大概情形馳奏仰慰

宸懷奏入

上諭內閣曰逆匪竄陷安慶省城負嵎久踞上年冬開官軍合圍以後逆首陳玉城疊次來援我軍堅擥力戰卒能克復城池圍殺逆匪淨盡洵足伸天

三才圖會卷之二十三
討而快人心所有詳細情形及在事出力人員著
官文等查明迅速具奏

臣等謹案安慶爲金陵門戶皖北要衝逆賊
久踞焉正如常山之蛇首尾相應也安慶不
克則皖北何由平皖北未平則金陵何由復
並胡林翼先攻安慶之奏

知人則哲

廟算精詳遂能克復名城埽除兇醜爲東南軍務一大
轉機從此勢若建瓴功成破竹不數年而擒
渠埽穴一律肅清竄哉

聖神之廣運不可及矣

同日嚴樹森奏言疊接探報楚北克復德安匪
衆敗竄分股入豫一由馮家莊一由王家岡一

由青石橋等處同至信陽州境之賢山地方七月十七日直撲州城南汝光道趙書升等率領兵團登陴守禦賊匪屢次攻襲均經擊敗先後轟殺五百餘名趙書升等商定乘夜往劫賊營焚燒附近賊壘賊衆驚亂自相踐踏擊斃無數都司陳廣譽等帶勇自南門出賊見援兵踵至不敢戀戰紛紛向東奔竄立解城圍州境一律

肅清東竄之賊連撲羅山光山商城等縣亦經
兵勇擊敗遂由商六交界之金家寨一路繞回
皖境此次守城殺賊出力各員可否籲懇
天恩俯准獎勵奏入

上諭內閣曰湖北德安敗匪分股竄入信陽州境直
撲州城經趙書升等帶兵堵剿斃賊無數立解城
圍州境一律肅清該逆復犯羅山光山等處均經

該處兵勇擊卻辦理尙爲得手河南南汝光道趙
書升著交部從優議敘署信陽州協副將經文布
著賞換花翎都司李世玉陳廣譽均著以遊擊儘
先補用把總魏振鐸著免補把總以千總儘先補
用並賞加守備銜賞換花翎其餘出力員弁紳練
兵勇著嚴樹森查明保奏

十九日 乙亥 湖南巡撫毛鴻賓奏言江西賊蹤遠

竄楚省東路解嚴粵西石逆一股又由賓州竄
至貴縣南路防務亦未可稍鬆臣已札飭江忠
義折回新甯確探粵西情形妥籌防剿其東路
各營仍飭分扼邊隘以助江省聲援前准曾國
藩咨調劉墩所部赴左宗棠軍營卽令由江西
前進儘沿途遇賊兼可與江軍會剿以期得力
奏入報

聞

二十二日

戊寅

慶端瑞璵奏言現在處州郡縣並

衢屬之常山江山各城均已克復惟金華蘭谿
之賊恃衆負隅龍游不守林福祥已抵蘭谿會
同張玉良饒廷選攻剿蘭谿踞逆張啟煊一軍
亦由處州前進會攻金華已革道員馮席珍扼
紮江山以防賊由龍游下竄綜計浙省兵力足

敷防勦總兵曾玉明林文察等所統臺灣兵勇
現在各止五百餘名實形單薄勢難援浙已飭
林文察派弁馳赴臺灣另行選募精壯勇丁二
三千名容俟續募勇丁到省再行酌覈調度奏
入報

聞

二十五日 辛巳 大學士湖廣總督官文兩江總督

曾國藩湖北巡撫胡林翼安徽巡撫李續宜福建提督楊載福福州副都統多隆阿奏言安慶圍師自七月十三日攻破北門外賊壘後城賊自是日蹙狗逆陳玉城糾合僞輔王楊逆及洪逆朱逆等共四五萬人於十六七八九等日陸續入關在關口毛嶺十里鋪一帶紮營四十餘座散布山岡城賊亦列隊西門遙遙相應二十

日該逆出全隊撲我後濠分十餘路而來其撲西北一隅者勢尤洶湧我軍不動聲色俟其逼近始以槍礮轟擊斃賊無數二十一日仍猛撲如前次日我軍修築礮壘一座占住要地而毛嶺十里鋪及關口之賊傾巢齊出其撲中路者約萬餘人直至新壘之下我軍以槍礮三面夾擊傷斃之賊屍滿田隴狗輔兩逆會復親自督

陣賊退卽揮刃砍之猛撲十餘次我軍新營已成賊始卻退未幾而後隊之賊仍大呼齊進曾國荃督率各營併力穩擊自夜達旦其犯西北兩路者亦猛撲數次經彭毓橘等擊退是役也相持半日一夜之久賊之精銳實傷斃三千餘名援賊兇鋒大挫二十三日至二十八日每夜輪撲後濠各營均嚴爲戒備水師亦由鹽河口

開礮橫擊斃賊不少該逆旣屢挫於西北又欲
從中路衝突因於菱湖北岸陸續築壘十餘座
二十九夜賊以大隊撲壘而暗用小划送米入
城蔡國祥率礮船阻截概行搶奪其撲水邊營
壘者亦經朱洪章等擊退三十日曾國荃於菱
湖南北兩岸紮營四座派人駐守與水師互相
聯絡賊划愈難出入城中米糧盡絕賊益慌亂

逆首張潮爵等將由水路逃遁適我軍所空地
道業已開竣裝藥五更火發轟塌北城牆垣曾
國荃分派隊伍登城與水師兩路夾擊西門二
壘之賊經後左副後振字義字各營殺盡東門
之賊經新後吉左湘恆智字長勝各營殺盡北
門正街一路之賊經中軍嚴字制字和字護軍
及馬隊各營殺盡其從百花亭踰城逃出之賊

經水師營官萬化林蔡國祥派隊殺盡衆賊首
均死於亂軍之中八月初一日卯刻克復安徽
省城其菱湖援賊數壘亦經長勝吉左智宇各
營攻撲焚燒殺賊千餘陳楊各逆見我軍攻克
城垣俱爲膽落退遁集賢關外臣等查安徽省
城淪陷九載楚軍自克九江後節節掃蕩旋於
去歲進兵水陸合圍城內之賊不下三四萬逆

會陳玉城糾合南北兩岸悍賊疊次上竄圖解
官軍之圍其桐城援逆經臣多隆阿力挫兇鋒
該逆未能合併復經臣等督飭陸師痛剿援賊
水師扼斷接濟曾國荃率圍軍穩守長濠加勁
環攻絕其接應賊之狡計愈窮此次英輔珩朱
四逆會入關號稱十萬各營全力堵禦前後傷
斃賊衆六千餘名迨克復省城之日除釋放婦

女老幼數千人外殺斃溺斃之賊實數一萬六
千有奇東南大局漸可挽回所有水陸各營統
領將官謹開單籲請

聖恩獎敘其在事尤爲出力及節次陣亡各員弁容
俟查明分別彙保請卹

官文胡林翼李續宜又奏言統領安慶全軍卽
用道曾國荃管帶湘恆等營國子監學正銜候

選訓導曾貞幹均係兩江督臣曾國藩胞弟國
荃隨同該大臣出師軍營屢次著績前因曾國
藩帶兵援浙派令圍攻安慶臣等以圍師太單
增其弟貞幹所部千人合同勦辦該員等苦守
苦戰力禦援賊十餘萬潛挖地道攻克堅城逆
匪無一漏網智勇兼施厥功甚鉅程學啟改過
自新奮勇圖報數月內屢次血戰殺賊最多實

爲軍中有用之才仰懇

聖恩均予獎敘奏入

上諭內閣曰安慶省城被陷九載楚軍由九江進攻
水陸合圍逆首陳玉城屢次糾黨來援均經擊退
城破之日被殲及溺斃賊匪至一萬六千餘名欽
差大臣大學士湖廣總督官文欽差大臣兩江總
督曾國藩調度有方均堪嘉尙官文著加恩賞加

太子太保銜曾國藩著加恩賞加太子少保銜湖北巡撫胡林翼首先畫策身親督勦厥功甚偉著加恩賞加太子太保銜並賞給騎都尉世職安徽巡撫李續宜前經隨同籌辦著加恩賞穿黃馬褂福建水師提督楊載福福州副都統多隆阿疊著戰功均著加恩賞給雲騎尉世職其在事尤爲出力之知縣彭毓橘著免選直隸州知州以知府留

於兩江補用並賞換花翎都司李臣典著免補遊
擊以參將歸於兩江補用並賞給堅勇巴圖魯名
號副將蕭孚泗張勝祿均著以總兵交軍機處記
名請旨簡放並賞加提督銜都司朱洪章著免補
遊擊以參將留於湖南補用並賞給勤勇巴圖魯
名號副將李寶賢著以總兵交軍機處記名請旨
簡放並賞給剛勇巴圖魯名號知府劉連捷著以

道員留於江西補用並賞給果勇巴圖魯名號參
將張光明著以副將留於湖北補用並賞加總兵
銜賞給爽勇巴圖魯名號周惠堂著以副將留於
湖北補用並賞加總兵銜張詩日著以副將留於
湖北補用並賞加總兵銜賞給幹勇巴圖魯名號
直隸州知州凌蔭廷著以知府留於兩江補用並
賞加道銜副將羅逢亢著以總兵交軍機處記名

請旨簡放並賞給展勇巴圖魯名號都司彭萬全
著免補遊擊以參將留於江西補用參將周萬倬
著以副將歸於兩江補用並賞給衛勇巴圖魯名
號都司陶保堂著免選遊擊以參將歸於兩江補
用並賞換花翎同知陳湜著以知府留於兩江補
用並賞換花翎副將李祥和著賞加總兵銜並賞
給著勇巴圖魯名號遊擊黃思學著免補參將以

副將留於湖北補用並賞加總兵銜都司滕嗣武
著免選遊擊以參將留於兩江補用並賞換花翎
遊擊朱維堂著免補參將以副將仍留湖南補用
武明良著免補參將以副將留於兩江補用都司
楊鎮南著以遊擊留於兩江補用並賞加參將銜
賞換花翎遊擊曾昭禮著免補參將以副將留於
兩江補用參將朱維高著以副將留於兩江補用

並賞加總兵銜守備劉祥勝著免選都司以遊擊
留於兩江補用並賞換花翎遊擊晏恭山著免補
參將以副將儘先補用並賞給直勇巴圖魯名號
知縣彭椿年著賞戴花翎並賞給正五品封典易
良虎著賞加同知銜並賞給正五品封典訓導黃
潤昌著以知縣留於兩江補用並賞加五品銜知
縣曾席珍羅麓森均著留於兩江卽補並賞換花

翎賞給正五品封典守備郭松林著免補都司以
遊擊仍歸江西補用並賞給奮勇巴圖魯名號把
總倪桂著免補守備以都司選用並賞換花翎羅
雨春著免補千總以守備選用並賞加都司銜賞
換花翎從九品李肇繹著以縣丞不論雙單月遇
缺卽選並賞加五品銜總兵王明山著賞加提督
銜副將丁泗濱何瑞祥李濟清蔡國祥均著交軍

機處記名遇有總兵缺出請旨簡放李濟清並賞給績勇巴圖魯名號蔡國祥並賞給安勇巴圖魯名號彭楚漢著賞加總兵銜並賞給利勇巴圖魯名號劉正隆著賞給勁勇巴圖魯名號唐學發著賞加總兵銜並賞給卓勇巴圖魯名號參將羅進賢著以副將遇缺儘先選用並賞加總兵銜賞給確勇巴圖魯名號遊擊郭明鼐蔡定發均著免升

參將以副將遇缺儘先選用郭明鼈並賞換花翎
參將趙三元著以副將遇缺儘先選用並賞給彭
勇巴圖魯名號遊擊韋志俊鄧萬林均著以參將
遇缺儘先選用並賞加副將銜副將楊占鼈著賞
給資勇巴圖魯名號都司羅宏裕著免升遊擊以
參將遇缺儘先選用副將萬化林著交軍機處記
名遇有總兵缺出請旨簡放其餘出力及陣亡員

弁著該大臣等查明分別奏請獎卹至道員曾國
荃等圍攻安慶智勇兼施曾國荃著賞加布政使
銜以按察使記名遇缺提奏並加恩賞穿黃馬褂
以示優獎訓導曾貞幹著免選本班以同知直隸
州知州儘先選用並賞戴花翎程學啟奮勇立功
著以遊擊儘先卽選並賞戴花翎

官文胡林翼李續宜又奏言曾國藩兄弟忠義

孝友萃於一門候選同知曾國華前於咸豐八年
在三河殉難追贈道員其兄國藩率師東征
備盡勤勞其弟國荃率其季弟貞幹圍攻安慶
屢挫援賊克復名城臣等每聞其臨陣誓師忠
憤激發而念及國華殉難尤歔歔流涕不能自
已軍士均爲之感動現在曾國荃曾貞幹已由
臣等奏請獎敘可否仰懇

特恩將前在三河殉難追贈道員之曾國華

予諡以爲一門忠義者勸奏入

上諭內閣曰候選同知曾國華前在三河殉難追贈
道員今其兄曾國藩其弟曾國荃曾貞幹率師剿
賊克復安慶一門忠義深堪嘉尚曾國華著加恩
予諡以彰忠烈

同日毓科奏言查義甯擊敗之賊竄陷新昌上

高縣城李元度督軍進剿連獲大勝立將兩城
次第克復復派隊進剿奉新殺賊無數各營進
薄城下賊衆宵遁縣城亦卽克復瑞州踞逆聞
風膽落又因鮑超大軍將至無復負隅之意李
元度乘勢進兵與賊接仗殺斃四百餘名該逆
大敗向臨江大路竄去府城克復賊自瑞州竄
出後分擾清江分宜各縣併攻臨郡知府丁峻

帶兵扼守臨江而以礮船沿江截擊轟斃賊匪甚衆賊始解圍渡河而去遂竄踞清江之樟樹鎮臣飛飭安肅道劉于濤統帶內河水師泝流而上擊賊於薛家渡等處殲斃約千餘名賊由樟樹鎮下游偷渡潛竄拖船埠分股下竄豐城遊擊劉勝祥迎頭截擊頗有斬擒時鮑超已抵豐城對河該逆潛渡河西欲襲其後鮑超派隊

分中左右前進賊大隊約二萬餘人前來拒敵
鮑超又遣總兵宋國永等由山後抄襲揮令各
營分途衝入鏖戰一時賊衆大敗追殺五十餘
里斃賊約七八千名豐城西北岸賊壘一律踏
平東岸之賊亦悉驚潰劉于潯遂乘勢收復樟
鎮查鮑超自入江以來威望所加賊已望風而
遁茲由瑞州跟蹤追剿一經指揮卽獲大捷實

足以褫賊魄該鎮智勇過人忠誠夙著轉戰江
皖所向無前洵不愧爲名將惟係提鎮大員應
如何優加獎敘恭候

聖裁李元度於克復義甯後乘虛直擣五日之內連
復四城厥功甚偉擬請

賞加布政使銜其革職拏問之案可否免其查辦在
事出力員弁兵勇容臣查明擇尤酌保署瑞州

府知府陸澄署瑞州營都司劉青雲高安縣知
縣劉奎光署奉新縣知縣張國英雖募勇隨同
克復究屬功不掩過業經革職應毋庸議著上
高縣知縣趙有梯失守地方咎無可辭應請卽
行革職如查有棄城逃避情事再行據實嚴叅
已革署新昌縣知縣趙樸庭於收復縣城後復
因被陷殉難情殊可憫應請開復原官照例議

卹奏入

上諭內閣曰瑞州逆匪自李元度等擊退後竄擾清江分宜各縣並攻臨江復竄至清江之樟樹鎮分股下竄豐城鮑超三路進剿斃賊七八千人豐城西北岸賊壘一律踏平乘勢收復樟樹鎮辦理甚爲得手湖南綏靖鎮總兵鮑超著交部從優議敘李元度著賞加布政使銜其徽州失守之案應否

免其查辦仍著曾國藩酌覈具奏所有此次出力
員弁兵勇著毓科會同官文等查明擇尤保奏著
上高縣知縣趙有梯失守城池著卽革職如查有
棄城逃避情事卽行從嚴參辦已革署新昌縣知
縣趙樸庭於收復縣城後復因被陷殉難情殊可
憫著開復原官交部照例議卹

毓科又奏言樟鎮等處之賊現分股竄入臨川

問

縣境前隊已抵撫州已飛札劉于潯迅率水陸
各軍回撫援剿復函商鮑超由豐城拔營星馳
赴撫以資援應奏入報

二十九日乙酉官文曾國藩奏言自安慶得手後

桐城踞逆已成孤注多隆阿親率馬步追剿援
賊派副都統穆圖善力攻桐城卽於八月初三

日克復蘄州踞逆亦經臣等添調水陸各軍於
初九日克復斃賊甚多合將克復日期先行馳
報

同日李續宜奏言安慶克復後僞英王陳玉城
僞輔王楊輔青等聚集逆黨由宿松上竄圖犯
鄂疆臣於十三日拔營馳赴黃州相機攻剿以
期早清鄂境卽行赴皖均奏八報

欽定剿平粵匪方略卷二百七十四 辛酉年

九月初六日 辛卯 曾國藩奏言安慶省城經水陸

官軍克復後提臣楊載福卽派總兵王明山黃翼升率水陸各營進攻池州王明山令趙三元等於八月初五日繞城攻擊該逆以槍礮抵拒趙三元率水師奮勇登城賊不能支遂開西門而遁適王明山黃翼升率水陸各營趕到殺賊

甚多立將府城克復現派韋志俊帶陸師四營
守之仍留水師二營護之王明山黃翼升卽日
進攻銅陵臣查僞右軍劉官方盤踞池州與安
慶相爲犄角老巢屢攻不破內則堅守石埭太
平阻徽師進兵之路外則上犯建德鄱陽爲江
西北邊之患今幸克復安慶池州亦相繼而下
從此皖南軍務當日有起色足以仰慰

聖懷奏入

上諭內閣曰此次官軍進攻池州殺賊無算立將府城收復辦理甚爲得手著曾國藩卽飭水陸各軍分路進攻將失陷城池次第收復迅掃賊氛

初十日乙未田興恕奏言八月初一日據總兵楊

巖寶等稟稱仁懷地界疊經該鎮等督兵搜捕已無賊蹤乃粵匪分路潛竄該縣界接川省葦

江永甯等縣現在跟蹤追剿等情臣當嚴飭楊
巖寶等督兵分路追殺不得存驅賊出境之見
復據楊巖寶等稟稱賊至桐梓縣屬之放牛坪
一帶專由僻徑趨行我軍隨後追剿該匪不敢
接仗漫山狂奔被我軍殺斃三百餘名滾巖跌
水死者又數百名復追至牛渡灘該處左右皆
山十分險峻前阻溪河我軍從後掩殺計斃一

千有餘其僞總制朱洪新回竄桐梓縣經署知
縣胡鑑會合遵義團勇迎勦斃匪數十名適副
將周洪順帶隊踵至合力奮擊立將朱洪新槍
斃陣斬二百餘名復經官軍將李添亡全股殲
除淨盡餘匪由擔子山竄涪州白馬鎮臣伏查
粵匪蓄意窺川實非一日上年由泗城竄入黔
界連陷州廳裹脅甚衆屢經臣督飭鎮將將城

池一律收復斬馘萬餘招降無數該逆攻撲安順安平平遠黔西大定畢節仁懷桐梓等府州縣均爲我軍奮力擊敗臣前於賊竄仁懷時卽派總兵吳安康選帶勁旅三千赴川會剿乃黔省鎮將甫欲入川因軍糧無出未能過界再四籌思涪州下達荆宜旁徧西秀且與黔省婺川思南印江等處毗連設再勾結教匪剿捕愈難

現飭吳安康一軍由婺川一帶探明賊蹤攔頭
截剿其楊巖寶各軍已陸續撤回惟臣受

命剿賊一匪未淨卽屬督剿不力相應請

旨將臣交部議處至總兵楊巖寶等未能立時攔截
致令餘匪竄入川疆除避賊行走之都司劉金
龍謝光才實屬有心貽誤業經臣按軍法從事
以昭炯戒外請

旨將古州鎮總兵楊巖寶撤去固勇巴圖魯名號拔
去花翎總兵吳安康周洪順梁正秀一併革職
均仍留營勦賊以觀後效儻再不知奮勉卽由
臣嚴叅治罪奏入

上諭內閣曰粵匪自貴州仁懷地界潛竄桐梓縣屬
之放牛坪一帶遁逃我軍分路追勦斃賊多名其
李添亡一股亦經殲除淨盡餘匪由擔子山竄至

涪州白馬鎮田興恕統兵勦賊致令餘匪闖入四
川界內究屬督勦不力著交部議處總兵楊巖寶
等未能立時攔截除都司劉金龍謝光才業經正
法外古州鎮總兵楊巖寶著撤去固勇巴圖魯名
號拔去花翎總兵吳安康副將周洪順梁正秀均
著革職留營效力儻再延玩卽著嚴叅治罪

同日吏部兵部奏言遵議浙江道御史卞寶第

奏地方官棄城不守免罪後續保官階請飭部
議定限制等語臣等查官員失守地方卽應革
職擬罪至留營效力帶罪圖功已屬非常曠典
乃現在督撫大臣一遇地方失守卽將該管官
革職留營賊來無備賊去又報收復無怪賊勢
蔓延相應請

旨飭下各督撫大臣遇地方失事必該員素得民心

兼能奮勇殺賊方准留營效力若孱弱無能不
知振作者一經失事卽照例覈辦不得概請留
營效力至失守城池後隨同克復之員祇准免
罪續有勞績再由該督撫大臣酌給虛銜頂戴
俟三次得有勞績方准開復原官仍應飭令補
交捐復銀兩俟銀兩交清軍務完竣後送部引
見如該員開復原官後續有勞績臣部再行辦理再

查失守城池人員得有勞績開復原官若再免繳捐項未免過優相應奏明請

旨嗣後擬將失守城池之文職該管官如得有勞績開復原官仍應補交捐復銀兩不准奏請免繳捐項如蒙

俞允臣行文各省督撫及各路統兵大臣一體遵照辦理

兵部又奏言武職失守城池亦應嚴定章程以
示限制凡有聞警先逃藉奉委出境及藉赴他
處招集國勇以致城池失陷者俱不准免罪其
實係兵單力竭身受重傷失陷後隨同收復者
革職免其治罪留於本城效力未受傷者帶罪
效力其帶罪效力各弁果能奮勇殺賊准其免
罪如再續有勞績准其酌給頂戴其賞給頂戴

效力各弁如復遇賊匪攻撲城池能隨同抵禦
竭力固守不致再陷者准其開復原官至地方
收復後賊匪不復攻擾該效力各弁始終勤奮
並無貽誤者俟該省軍務完竣准其覈保開復
原官又守禦不力藉名被賊闖入者照例治罪
旋即自行收復者革職留城效力其留城效力
各弁不准留任與調往他處差遣以杜取巧又

地方失守不得藉在外堵禦回援莫及被賊闖
入後旋卽隨同收復等情遽請免罪又城守營
弁缺出或一時揀調乏人派委效力各弁代署
如復有疏虞者除將該弁從嚴治罪外所有派
委代署之上司等罪名處分亦加等定擬以示
懲儆奏入

上從之

十七日

壬寅

官文胡林翼奏言官軍自攻克安慶

後集賢關內外援逆陳玉城等率賊六七萬人
向東徘徊道員曾國荃與多隆阿分途追剿初
二日曾國荃派曾貞幹等從東路石塘湖畔進
擊賊衆敗潰向五顯廟一帶逃竄曾國荃指揮
各營將關內外賊壘賊館悉數埽平共殺賊二
千有奇多隆阿一面督隊跟剿一面令候補副

都統穆圖善進取桐城狗輔各酋排隊相抗多
隆阿開道抄出斃賊二百餘名穆圖善派副將
譚仁芳等分路齊進直抵桐城西南北三門該
逆以大礮轟擊我軍數伏數起拔毀木城以柴
草填濠而過奮勇登城施放火器霎時火光燭
天賊山東門而逸雷正綰譚仁芳等營一擁進
城分路抄截該逆不及出城者約一千餘人斬

除淨盡當將桐城克復穆圖善擊殺賊匪三百
餘人追至呂亭驛又斃賊四五百人餘賊向廬
江奔竄其由黃泥港趨犯太湖之賊經溫德勒
克西等馬隊追殺一千餘人解散脅從七百餘
人八月初六日偵知賊由劉公鋪等處悉奔宿
松之桃花鋪溫德勒克西等三路抄擊鏖戰數
時連斃黃衣騎馬賊目數名悍賊百餘名賊遂

大潰計斃賊二千餘名敗賊均奔宿松官軍追及賊奪西門而出當於初八日將宿松縣城克復敗賊悉竄黃梅我軍馬隊沿途追殺直抵黃梅大東門外賊屍徧野該逆復奔大河鋪城賊見勢不支卽由大西門出竄我軍截殺入城將未出城之賊擒斬無遺初八日將黃梅縣城克復其彭玉麟一軍派令礮船力攻蘄州署知州

李璿由陸路進擊賊向東路逃竄我軍截殺數百名蘄州城池亦於初八日克復多隆阿又於十一日派隊追剿廣濟之賊擒斬多名遂將廣濟縣城克復臣等查桐城爲七省要道又爲安慶咽喉該逆以悍黨萬餘踞城死守我軍克此堅城旬日之內由宿松黃梅蘄廣節節掃蕩斬馘萬衆實足以伸

天討而快人心所有尤爲出力之道員曾國荃可否
賞給勇號候補總兵雷正綰等先行開列伏候

恩施其餘出力員弁兵勇容臣等查明請獎奏入

上諭內閣曰此次官軍追剿安慶援賊疊獲勝仗並
分兵克復桐城宿松黃梅蘄州廣濟等州縣斬馘
幾及萬人辦理甚爲得手著官文等仍飭帶兵將
弁實力搜捕淨盡勿留餘孽記名按察使曾國荃

著賞給偉勇巴圖魯名號記名總兵楊朝林著仍
交軍機處記名遇有總兵缺出提奏參將石清吉
著賞給幹勇巴圖魯名號總兵銜趙克彰著交軍
機處記名遇有總兵缺出請旨簡放並賞還摯勇
巴圖魯名號儘先副將趙旣發王可陞均著免補
副將交軍機處記名遇有總兵缺出請旨簡放儘
先參將藍斯明著免補參將以副將儘先卽補並

賞給剛勇巴圖魯名號副將銜朱希廣著以副將
儘先卽補並賞加總兵銜賞還勁勇巴圖魯名號
遊擊張養吾著免補遊擊以參將儘先卽補並賞
加副將銜佐領穆圖善著賞給西林巴圖魯名號
委營總哲克棟額著賞加副都統銜富平阿著賞
給哈喜巴巴圖魯名號協領雙福著賞給德楞額
巴圖魯名號協領溫德勒克西著仍以副都統交

軍機處遇缺提奏佐領巴彥杜楞協領舒倫保均
著以副都統記名簡放協領富慶阿著賞給胡爾
察巴圖魯名號副將余福象曹克忠均著以總兵
交軍機處記名遇缺提奏副將梁洪勝王萬年均
著賞加總兵銜巢日升著賞給捍勇巴圖魯名號
副將陶茂林著賞給鋒勇巴圖魯名號參將譚仁
芳著賞給衝勇巴圖魯名號雷正綰已補授陝西

陝安鎮總兵著另行請獎其餘在事出力員弁兵勇著官文等查明擇尤保奏候朕施恩

官文胡林翼又奏言黃郡踞逆負嵎固守並於城外築壘以抗我師經臣等調派李續燾等及臬司彭玉麟督水師各營扼截城賊相機進攻又派候補總兵成大吉等馬步各隊駐紮上巴河其多隆阿於克復宿黃廣蘄四邑後統帶馬

步全隊在漸水之曹家河會合迎勦下游擊敗之賊以絕其援八月二十三日蔣凝學令投誠之劉維楨設計誘賊全隊出城我軍號礮一聲伏兵四起焚燒賊篷賊館火光燭天馬步衝擊賊屍徧野其逃奔三台河渡江者又爲水師圍勦落水死者無算我軍遂攻入城中搜殺餘匪當於二十四日將黃州府城克復並分軍追襲

逃匪務期盡殲醜類以絕根株奏入

上諭內閣曰此次官軍克復湖北黃州府城著官文等督飭各軍跟蹤進剿務期盡殲醜類其在事出力各員弁著查明保奏候朕施恩

同日官文奏言湖北撫臣胡林翼前於咸豐八年冬閒率師下剿駐軍皖境謀攻懷桐親督行陣去年冬閒由英山移營太湖偶患風寒漸成

咳逆嘔血之證本年五月因江西股匪上犯楚
疆胡林翼督軍回援臣屢次往晤見其病體未
痊而精神尙好諄囑安心調治惟值楚皖逆氛
未靖胡林翼於軍務地方仍復力疾籌辦入秋
以來病勢日增嘔血每至升餘延至八月二十
六日亥刻出缺臣查胡林翼自咸豐三年出師
歷在楚皖軍營迄今九載之久六年克復武昌

及沿江郡縣八年克復九江本年七月克復德
安八月克復安慶桐城及黃州郡縣城池計胡
林翼身經數百戰攻克楚皖江西等省府州縣
城池數十處頻年楚軍聲威大振所向克捷皆
賴胡林翼與臣和衷共濟力挽時艱而於籌兵
籌餉用人理財諸要政悉本愛民體

國之忱且知人善任愛才若渴懲奸剔弊賞罰嚴

明是以將士樂爲之用其才智實在臣之上尤
爲封疆大吏不可多得之員胡林翼並無昆弟
子息僅有嗣子子勳年甫八歲並眷屬數人在
署日擊尤堪憫惻合無籲懇

天恩從優賜卹並請

予諡入祀賢良祠在湖北省及湖南原籍建立專祠
以爲公忠盡瘁者勸奏入

上諭內閣曰湖北巡撫胡林翼秉性忠直操守廉潔
由翰林洊官府道仰荷

皇考大行皇帝特達之知於咸豐三年調赴湖北軍營
晉擢巡撫

賞給頭品頂戴太子少保銜在軍營九年賞罰嚴明知
人善任克復武昌及沿江郡縣肅清楚境並調遣
官軍攻復江西九江軍威丕振所向克捷本年八

月克復安慶省城朕念其公忠體國懋著勲勞賞
加太子太保銜並賞給騎都尉世職方冀長資倚
畀克奏膚公乃以積勞成疾甫經賞假遽聞溘逝
披覽遺章實深悼惜胡林翼著追贈總督卽照總
督例賜卹任內一切處分悉予開復應得卹典該
衙門察例具奏並加恩予諡入祀賢良祠並於湖
北省及湖南原籍建立專祠伊子胡子勲俟及歲

時由吏部帶領引見以示朕篤念蓋臣至意

上又諭內閣曰湖北巡撫著李續宜調補仍著駐紮
湖北安徽交界地方督辦軍務

十八日卯癸瑞昌王有齡奏言臣等以浦江當蘭

谿之衝當派總兵文瑞等帶兵扼紮張玉良復
派副將況文榜督兵赴浦饒廷選來省會商後
卽於八月初七日馳往諸暨會同諸軍節節進

勦詎蘭谿之賊於初三日來犯浦江旋即圍城
經官軍分投抵禦斬獲頗多饒廷選復派兵進
紮白馬橋等處以爲援應猝遇逆匪包抄營盤
失陷諸暨同時喫緊其由分水竄至大畈一帶
之賊焚燒擄掠其地在嚴州下游三十里經張
玉良派隊擊走該逆又率死黨萬餘分作數十
起漫山徧野而來撲我南岸各營都司何朝倫

正在開礮把總虎懷棟已由後營門而出都司
曾鵬舉等相率奔潰南峯塔營盤遂失其放馬
洲營盤尙有一河之隔都司張元勝等亦棄營
不守十六日該逆卽由七郎廟南關口過河直
薄嚴州城下屢次攻撲桐廬亦爲戒嚴臣等調
派閩勇一千四百餘名前赴諸暨歸饒廷選調
遣又令副將吳再升會同饒廷選所部各軍滾

營前進立解浦江之圍福建所派道員張啟煊
一軍已抵處州卽令由永康東陽一路進剿以
爲諸暨浦江策應並派同知陳大力等軍由衢
州繞至桐廬合新募楚勇五百名爲守桐援嚴
之用伏查嚴州城外各營不戰而潰非尋常失
機可比現在諸將弁多無下落各兵勇亦未歸
隊應咨會張玉良詳細查明從嚴懲辦張玉良

身爲統領調度無方亦難辭咎該提督曾白請
從重治罪應察看嚴州情形再行叅奏浙省賊
勢蔓延將玩兵疲亟須另易勁旅相應請

旨飭催左宗棠迅速赴援其已革道員李元度一軍
准官文咨照飭令掃蕩兩湖邊境及江西義甯
等處賊匪現在浙省軍情萬緊仍請

飭官文等另行派員勦辦湖北江西之賊俾李元度

星馳赴浙隨同左宗棠勦辦庶於大局有裨奏

八

上命載垣等傳諭瑞昌王有齡曰左宗棠一軍已據
曾國藩奏稱徽嶺內外及饒州廣信各屬戰守事
宜均賴該員經理一時未能赴浙李元度於克復
義甯州後據官文等奏稱令其肅清江西腹地卽
赴浙省本日已諭知官文催令該員統帶所部迅

赴浙江援剿矣浙省南路軍務喫緊張玉良防剿不能得力屢經諭令瑞昌等派饒廷選前往督辦乃該將軍等未能破除情面任令張玉良恇怯貽誤以致浦江嚴州同時被圍諸暨桐廬喫緊實堪痛恨此次嚴州城外各營如何潰退卽著瑞昌王有齡查明失事各員分別正法懲辦張玉良調度無方亦應據實嚴叅林福祥責令督飭兵勇兼顧

嚴州但能力解城圍賊自未敢由桐廬深入該將軍等所派同知陳大力等兵勇均著催令速行前進交該藩司調度以厚兵力浦江被圍緊急並著責成饒廷選親督官兵前往救援速解城圍以固東路藩籬不得株守諸暨致滋貽誤

上又命載垣等傳諭官文李續宜曰李元度一軍前據官文等奏稱令其肅清江西腹地卽赴浙省現

在江西賊勢稍鬆浙省情形甚爲喫緊李元度之
勇本係浙江所募自應先其所急著官文李續宜
卽飭李元度督帶所部練勇星速前赴浙江隨同
剿賊毋稍延緩

瑞昌王有齡又奏言臣等伏查近日金華蘭谿
之賊分竄龍游距衢州數十里萬分危急李定
太係統兵人員若遽行他往軍民咸懷疑懼饒

廷選張玉良林福祥現在諸暨嚴州桐廬防剿
該處賊氛正熾一時難以分身未能赴衢督辦
此外各員或資格較淺或威望較輕均不足當
統領之任惟徐宿爲咽喉重地誠如

聖諭關緊緊要臣等何敢將李定太一再請留因思新

授衢州鎮總兵朱品隆久歷戎行戰功累著且
衢州鎮係該員本任以之統領衢防諸軍可期

得力該員現在曾國藩軍營相應請

旨飭令曾國藩速令朱品隆馳赴新任接辦衢州防
勦事宜俾李定太得以迅速交卸起程庶於南
北軍務各有裨益奏入

上命載垣等傳諭曾國藩曰暫留衢防之候補總兵
李定太已派幫辦徐宿勦匪事宜卽應赴徐防勦
惟衢州防務正緊浙省並無統兵大員可以前往

接辦著曾國藩卽飭新授衢州鎮總兵朱品隆迅
赴本任統領衢防各軍接辦防勦以便李定太交
卸起程

瑞昌王有齡又奏言上年十二月閒甯國股匪
竄於潛之千秋關徽州股匪竄昌化之十二都
該二縣先後失守經臣等分飭各該地方官勸
辦團練該鄉民等無不志切同仇本年六月二

十一日昌化縣知縣汪春溥督同紳士帶團進
剿踏平賊卡三座該逆四散奔逃民團勇氣百
倍奮力追殺在白牛橋地方斃賊數百名典史
馬育和等帶團接應賊由沈嶺等處竄往淳安
當將昌化縣收復署於潛縣知縣包容於六月
十五等日帶團剿賊疊挫賊鋒二十二日將於
潛縣收復臣等查此股逆匪分踞於潛昌化業

經半載茲賴民團齊心敵愾兩日之內連克二
縣實屬出力異常該紳董團丁應分別請予獎
卹昌化縣知縣汪春溥署於潛縣知縣包容雖
疏於防範惟該縣並無城郭茲復督團收復功
過尙足相抵可否免其查議仍留本任之處出

白

逾格鴻施奏八

上諭內閣曰逆匪竄陷浙江於潛昌化三縣經知縣汪春溥包容督率團練將各該縣地方收復勦辦尙屬得手所有該二縣出力紳董及陣亡團丁著瑞昌王有齡查明奏請獎卹所稱該縣並無城郭請將知縣汪春溥包容免其查議仍留本任之處著吏部查照新定章程議奏

瑞昌王有齡又奏言據道員趙景賢稟稱逆匪

窺伺湖州四面環逼其西路廣德賊匪由四安竄至和平經團勇擊退後仍踞四安又欲約會青嶼嶺餘匪內犯長興爲團總張鼇擊敗該逆遁回廣德卽將四安收復其北路太湖賊船二百隻來犯經礮船出湖迎擊外委陳貴擊沈賊船二十餘隻斃賊三四百名賊船又犯亭子港等處經團總吳鳴皋等迎擊適吳淞各團伏

發水陸並攻斃賊無算賊船又到吳淞焚掠延
及高漚胡漚湯漚新浦等處各國擊沈賊船多
隻其西北路烏溪賊船來犯夾浦經都司江振
聲等擊退賊竄斯圻地方復經夾浦各營斃賊
三十餘名其東路及東南路平望賊船四五百
隻直竄南潯至六里橋地方當卽擊回其東北
路蘇州大股逆匪十餘萬由嘉興石門分犯杭

湖南路石門之賊竄入新市蘇逆又約烏鎮新市賊船千餘隻至五杭北陸一帶焚掠又竄至白彪村隨派遊擊陳永春等與菱湖之師聯絡進剿廣德之賊分竄吉安西門外之藍田村復經團勇迎擊大勝臣等查趙景賢以六七千兵勇與各路民團互相策應藉資捍衛此次蘇州大股逆匪窺伺杭湖復派得力水師擇要扼紮

且能先發制人進攻新市使該逆不敢窺伺尤
合機宜現五杭北陸一帶賊匪業經擊退臣等
擬派遊擊余星煥等督帶礮船前往新市會同
勦辦

瑞昌王有齡又奏言蘇州大股賊匪窺伺海甯
杭州又分竄塘棲經駐紮武林頭之遊擊余星
煥帶領礮船迎擊於八角亭月派數船由小河

繞擊其後兼調已革守備楊應龍帶領陸隊於
長橋左右設伏以待前後兜擊斃賊多名鏖戰
兩時賊始敗退賊匪五六千復分路出撲我軍
誘至長橋之外轟斃三四百名賊由後街道去
隨由龍光橋連次來撲余星煥親督各軍迎勦
適值北風大作船不得前又難施放槍礮塘棲
遂爲賊踞余星煥督兵進攻尾賊於龍光橋擊

之立將塘棲賊營焚燬時趙景賢派兵扼紮高
橋賊恐我軍兩面合擊退至石門一帶陳大力
親帶隊伍會兵進攻臨平賊知我軍將至亦遁
回石門目下海甯杭州安堵如故惟自嘉興以
至蘇常賊勢蔓延難保其不再圖侵犯所望左
宗棠李元度之兵相繼前來則不但杭湖保全
卽嘉蘇可圖恢復矣

瑞昌王有齡又奏言徽州餘匪由華埠常山竄往玉山爲玉山官軍擊敗仍回常山蔓延淳安分水桐廬一帶雖常山漸就肅清而湯溪蘭谿之賊於六月二十二日復陷龍游查衢防兵勇本有七八千人若能以剿爲防當不至成坐困之勢適參將胡鳳鳴管帶兵勇八百名由徽過衢臣等卽令截留以厚兵力並咨商李定太等

將冷水靈山之賊先行掃蕩現在賊勢趨重下
游龍游壽昌踞匪必不甚多應酌量情形分攻
二縣使賊有所牽制至四安雖經官軍克復惟
連接湖防局等處探報太湖一帶賊來頗衆現
有欲竄海甯之謠因思長安鎮上達海甯下通
省會係屬扼要之地非勁兵不能堵禦現因專
顧浙東兵力不敷分布該處未能設防雖臨平

尙留副將吳再升舊部千人勢難遙制臣等飛
飭趙景賢嚴防湖郡張威邦等嚴防海甯並派
隊赴長安一帶輪流巡哨刻下杭城兵勇抽調
一空設或浙西之賊同時蠢動臣等餉盡援絕
惟有嬰城固守效死勿去所以閩省文武軍民
無不盼望左宗棠李元度等援兵之速至也奏
入均報

聞

同日薛煥奏言據報嘉興逆首陳炳汶蘇州逆首熊萬淦率其醜類號稱十萬於八月初四日突由乍浦直撲金山衛城副將滕嗣林參將梁安邦立即分兵救援初五日賊來愈衆忽另股由海塘繞至後路將該城襲陷遂將營盤圍困提督曾秉忠等聞信派兵馳援疊破賊卡該逆

負嵎抗拒又值大雨連縣進攻未能得手而滕
嗣林等被圍已十餘日萬分危急不但糧斷炊
絕軍火亦俱用盡祇得於十六日四更時乘賊
稍倦衝圍而出弁勇傷亡甚多滕嗣林梁安邦
俱身受多傷僅與所部將士數百人且戰且走
該逆悉衆追趕勢如潮湧衝過柘林城擾及南
橋等處現經曾秉忠督率將弁分路進攻已將

柘林及金山衛城收復等情臣查該逆竄陷該城意在直撲奉賢南匯並圖犯洙涇又與嘉定青浦之賊一氣相連伺隙而發以致松江上海寶山人心亦爲震動滬防兵勇實覺不敷調遣臣祇得於無可抽撥之中竭蹶勻派分道並進以扼黃浦東南門戶曾秉忠亦督飭水師礮船與陸路各營分道嚴防該逆見處處皆有準備

是以不敢深入而臣所派諸軍與各縣民團會
台向前聲威尙壯柘林及金山衛城得以旋失
旋復不致擾及浦東完善之地惟該逆並未大
受懲創忽然退去其情殊爲叵測探聞蘇州逆
首陳坤書現又率賊數萬欲赴浙省故將逆黨
調回而聲東擊西乃其慣技或伺我軍撤回仍
圖乘虛撲犯更不得不加意嚴防所最爲喫重

者張堰及金山衛兩處非重兵不足以資堵剿
目下松江寶山等處各路防兵每處雖有三四
千名及一二千名不等但逼近賊氛若抽撥一
處卽爲賊開一處之門戶其勢萬難調動曾秉
忠及李恆嵩所帶水師長龍三板等船四百數
十隻分布泖湖及松江洙涇吳淞江不能移防
他處而黃浦江祇有礮船四十餘隻江面要口

甚多亦苦派防單薄臣稔知各處兵力此時萬
難分撥惟有就現有兵勇設法布置以冀仰紓
聖主宵旰憂勤之至意至金山衛城貼近海塘地勢
散漫路徑紛歧實屬防無可防是以滕嗣林等
擇於王家衝紮營以當乍浦之衝此次逆匪由
獨山分股撲犯牽掣該營別由張堰繞出我營
之後以致衛城猝被竄入滕嗣林梁安邦突圍

而出尙非畏葸挫潰者比合無仰懇

天恩從寬免其置議臣仍飭令收集兵勇奮勇圖功
以觀後效陣亡之安徽補用縣丞升用知縣章
振煦外委倪榮茂應請

旨飭部從優議卹其餘陣亡員弁兵勇民團客臣查
明分別請卹至金山柘林等營各專汛員弁俟
查明下落另案辦理奏入

上諭內閣曰逆匪糾合大股由乍浦直撲金山衛城
副將滕嗣林參將梁安邦等被圍旬餘突圍而出
尙非畏葸挫潰著從寬免其置議仍責令奮勇圖
功以觀後效陣亡安徽縣丞升用知縣章振煦外
委倪榮茂均著交部從優議卹其餘陣亡員弁兵
勇民團著薛煥查明分別請卹金山柘林各員弁
下落一併查明具奏

薛煥又奏言青浦嘉定逆匪近來日有增添屢至北簞山南翔鎮等處窺伺該處防軍出隊迎擊稍有斬擒賊卽退去比收隊回營賊又四出焚掠臣於七月中旬飭令副將李恆嵩進攻青浦參將姜德進攻嘉定一面會商著提臣曾秉忠相機策應李恆嵩至距青浦十里之桐石村壘攻賊壘殺賊數百名該逆拆斷橋梁堅拒進

兵要隘姜德由月浦羅店前進踏毀賊卡十八
座殺賊二百餘名賊仍憑壘堅守臣因金山衛
城之警正在酌調松江寶山兵勇助剿未暇籌
攻青嘉惟飭李恆嵩姜德扼要堵守待時而動
茲據李恆嵩稟稱青浦之賊忽從佘山一帶竄
至塘橋卽經派兵設伏扼堵要口李恆嵩帶隊
迎剿正在鏖戰之際鳳凰山鼓角齊鳴伏兵突

起該逆驚竄我軍水陸兜剿頗有斬馘因青浦
城中及桐石村之賊出巢接應另股在陳方橋
牽掣官軍是以未便窮追詎收隊後該逆仍在
北簞山列隊另分游騎往來當飭水陸兵勇夾
擊施放槍礮正值順風該逆受傷甚衆紛紛退
潰我軍掩殺數里賊仍退入桐石村又據姜德
稟稱劉河口忽來大小賊船六七十隻及釣船

沙船數隻陸路亦有賊卡該參將挑選勇丁乘
夜潛往出其不意撲毀賊卡二座直抵劉河賊
衆驚竄我軍施放噴筒火彈焚燬賊船數隻並
分隊追剿陸路之賊殺斃二百餘名天明後賊
又擁擁而來我軍分投迎擊連斃馬賊多名各
勇乘勢掩殺賊匪大潰其由劉行鎮竄至胡家
莊之賊亦經同知謝鴻遠會合民團迎剿賊卽

問

退去 臣查青浦嘉定逆匪意圖乘虛內竄雖經
防軍勦擊獲勝仍須防範加嚴日來浦東情形
稍鬆 臣已令各隊仍回原防並添撥長龍礮船
交謝鴻遠嚴扼胡家莊一帶以資堵禦奏入報
同日署安徽巡撫布政使賈臻奏言查逆賊於
湖北被擊後竄入皖境舒城踞賊分股接應署

知縣陳元泰等督兵進剿於九井吳家畝獲勝
其竄踞中梅河等處之賊急圖竄逸陳元泰等
會合楚軍並調派練丁圍剿殘賊無算進紮韓
塘適參將桂學高等帶兵踵至分紮舒城西南
北三門晝夜環攻賊勢不支遂由小東門竄出
官軍搶進西北兩門盡力搜殺賊屍枕藉於八
月初七日將縣城克復生擒賊目坂天燕等正

法該署知縣陳元泰等乘楚軍大捷之後會集
兵練先勦竄賊旋復城垣尙屬著有微勞合無
仰懇

天恩俯准將尤爲出力之署舒城縣知縣候補府經
厯縣丞陳元泰等分別給予獎敘其餘在事出
力員弁紳練容臣查明覈實酌保以示鼓勵奏
入

上諭內閣曰此次兵練擊退竄賊克復舒城縣城在
事尤爲出力之安徽署舒城縣知縣候補府經歷
縣丞陳元泰著免補本班以知縣卽補並賞戴藍
翎參將桂學高著賞加副將銜守備范文發著賞
加都司銜知縣趙光縉著俟補缺後以直隸州知
州用從九品陳衍緒著免補本班以府經歷縣丞
卽補千總吳維釗著免補千總以守備用其餘出

力員弁紳練著賈臻查明擇尤酌保毋許冒濫

賈臻又奏言候補知府袁懷忠前因委辦釐捐
恐有侵蝕情弊經臣奏叅革職訊辦尙未飭提
到案旋據該革員稟稱請赴六安霍邱一帶辦
團勦賊立功自贖臣以該革員果能辦理妥協
亦於大局有裨當卽專札飭辦隨據稟稱在六
安屬境之石婆店地方探有湖北德安敗逆由

光固邊界竄近六境之麻埠獨山一帶搶掠騷擾當卽督團於七月二十七二十九等日進擣獨山麻埠賊巢該革員選帶親軍首先衝入逆衆登時潰竄追斬數百人生擒老賊陳添幅等二十八名餘匪遁入舒桐老巢其救援黃州安慶之賊經楚軍擊敗回竄復擾麻埠流波礮勢將襲取六安州城該革員督率兵練分路設伏

併力合攻斬馘甚多該革員兩次獲勝似應量予獎勵惟係被參候審人員應俟審結後再行覈辦其在事出力紳練亦由臣暫行存記俟續有勞績彙懇

恩施奏入報

聞